

二十一都懷古詩





叢書集成

初編

主編者
王雲五

商務印書館發行

編主五雲王

編初成集書叢

詩古懷都一十二

中華民國二十六年六月初版

撰者 柳 得 恭

發行人 王 雲 五

印刷所 商 務 印 書 館

發行所 商 務 印 書 館

上海及各埠

上海河南路

上海河南路

(本書校對者陳敬衡)

五八六四

鎮

本館據仰視千七百二十
九鶴齋叢書本排印初編
各叢書僅有此本

洌水柳惠風好古工文詞所著有渤海考及二十一都懷古詩手稟舊存翁氏石墨書樓後入葉氏寶芸齋余又得之葉氏或言懷古詩有刻本刪改大半與此異則余未見柳氏此稟詞旨淹雅書蹟亦逾古可喜宜竝存也詩中牡丹字作牧丹蓋其國方言案尙書釋文牧誓徐音茂說文作姆字林音母顏氏家訓書證篇詩駟駟牡馬江南書作牡河北本爲牧唐石經牡馬作牧乃改刻疏引定本牧作牡牧牡古通段字也牡丹稱牡吳普諸家不詳其義又楚詞天問其牧王叔師注牧艸名牧之爲艸今亦未聞豈牧丹類耶余嘗謂殊方異域通其語言皆有古音古義之遺足資考證惜劉旌賢之書不傳無能說聲界矣因讀此詩附著之會稽趙之謙

二十一都懷古詩

朝鮮 柳得恭惠風撰

檀君朝鮮

東國通鑑。東方初無君長。有神人降于檀木下。立爲君。是爲檀君。國號朝鮮。唐堯戊辰歲也。至商戊丁八年。入阿斯達山爲神。三國遺事。檀君都平壤。

大同江水浸烟蕪。王儉春城似畫圖。萬里塗山來執玉。佳兒尙憶解扶婁。

〔大同江〕輿地勝覽。大同江。在平壤府東一里。一名浪江。又名王城江。其源有二。一出寧遠郡。加幕洞。一出陽德縣。文音山。至江東縣界。合流爲西津江。至府城東爲大同江。西流爲九津弱水。至龍岡縣。東出急水門入海。

〔王儉城〕三國史。平壤者。本仙人王儉之宅也。東史。檀君名王儉。輿地勝覽。燕人衛滿都王險。險。一作儉。卽平壤。

〔塗山執玉〕東史。夏禹十八年。會諸侯於塗山。檀君遣子扶婁朝焉。文獻備考。檀君子解扶婁。爲夫餘始祖。

箕子朝鮮

史記。武王既克殷。乃封箕子於朝鮮。而不臣也。漢書。殷道衰。箕子去之朝鮮。教其民以禮義。田蠶。

織作樂浪朝鮮民。犯禁八條。相殺以當時償。殺相傷。以穀償。相盜者。男沒入爲其家奴。女子爲婢。欲自贖者。人五十萬。東國通鑑。殷太師箕子。紂諸父也。紂無道。箕子被髮佯狂爲奴。周武王伐紂。訪道于箕子。箕子爲陳洪範九疇。武王封于朝鮮。都平壤。

兔山山色碧森沈。翁仲巾裾艸露侵。猶似龍年奔卉寇。松風閒作管絃音。

〔兔山〕輿地勝覽。箕子墓。在平壤府城北。兔山。

〔翁仲巾裾〕董越朝鮮賦。東有箕祠。禮設木主。題曰。朝鮮後代始祖。蓋尊檀君爲其建邦啓土。宐以箕子爲繼世傳緒也。墓在兔山。維城乾隅。有兩翁仲。如唐巾裾。點以爛斑之苔蘚。如衣錦繡之文襦。

〔管絃音〕文獻備考。壬辰之亂。倭掘箕子墓。左邊一丈許。樂聲自壤中出。懼而止。鹿眼籬斜井字阡。一村桑柘望芊芊。誰知遼海蒼茫外。耕種殷人七十田。

〔殷人七十田〕平壤府志。箕子井田在正陽含菴二門外。區畫宛然。韓久菴百謙作圖說。

衛滿朝鮮

史記朝鮮王滿者。故燕人也。燕王盧綰反。入匈奴。滿亡命。聚黨千餘人。魑結蠻夷服而東走。出塞。渡浪水。居秦故空地。上下障。稍役屬真番。朝鮮。蠻夷。及燕齊亡命者。王之。都王險。索隱曰。滿姓衛。應劭云。遼東有險瀆縣。朝鮮王舊都。臣瓚云。險城在樂浪郡。浪水之東也。括地志云。平壤城。本漢樂浪郡。王險城。

魁結人來漢祖年。同時差擬趙龍川。箕王可恨無分別。填補梟雄博士員。

〔博士〕魏略箕子之後。朝鮮王否子準立。燕人衛滿詣準降。準信寵之。拜爲博士。賜以圭。封之百里。令守西邊。滿誘亡黨衆稍多。乃詐遣人告準。言漢兵十道至。求入宿衛。遂還攻準。準與滿戰。不敵也。

樂浪城外水悠悠。誰識菽苴漢代侯。不及當年津吏婦。箜篌一曲豔千秋。

〔樂浪〕漢書朝鮮王滿傳。子至孫右渠。所誘漢亡人滋多。未嘗入見。終不肯奉詔。天子遣樓船將軍楊僕。左將軍荀彘。擊定朝鮮。爲眞番。臨屯。樂浪。玄菟四郡。文獻備考。樂浪郡治朝鮮縣。今平壤。

〔菽苴〕史記。朝鮮相韓陰亡。降漢。封爲菽苴侯。

〔津吏婦〕古樂府。琴操九引箜篌引。亦曰公無渡河。朝鮮津吏霍里子高。妻麗玉所作。子高晨起刺船。見一白首狂夫。被髮攜壺。亂流而渡。其妻隨呼止之不及。遂溺死。妻乃援箜篌而歌曰。公無渡河。公終渡河。公墜而死。將奈公何。聲音悽愴。曲終亦投河而死。子高還。以其事語麗玉。麗玉傷之。乃引箜篌以寫其聲。

韓

後漢書。韓有三種。一曰馬韓。二曰辰韓。三曰弁辰。馬韓在西。有五十四國。其北與樂浪。南與倭接。箕子後四十餘世。朝鮮侯準自稱王。燕人衛滿擊破準。而自王。準乃將其餘衆數千人。走入海。攻馬韓。破之。自立爲韓王。東國通鑑。箕準旣爲衛滿所攻。奪入海。居韓地。金馬郡。文獻備考。金馬今

益山郡有金馬山。輿地勝覽。箕準城在益山郡龍華山上。周三千九百尺。

當年枉信漢亡人。麥秀殷墟又一春。可笑蒼黃浮海日。船頭猶載善花嬪。

〔善花嬪〕三國志。朝鮮侯準。既僭號稱王。爲燕亡人衛滿所攻奪。將其左右宮人走入海。居韓地。東史。箕準號武康王。輿地勝覽。龍華山在郡北八里。世傳武康王既得人心。立國馬韓。與善花夫人遊山下。又云。雙陵在五金寺西數百步後。朝鮮武康王及妃陵也。

濊

漢書。武帝元朔元年。濊君南閭等。口二十八萬人。降爲滄海郡。後漢書。濊。北與高句麗沃沮。南與辰韓接。東窮大海。西至樂浪。本朝鮮之地也。賈耽古今郡國志。新羅北界溟州。古濊國。文獻備考。今江陵府東。有濊時所築古城遺址。

大關嶺外大東洋。藥國山川蔭搏桑。野老不知興廢事。田間閒拾古銅章。

〔大關嶺〕輿地勝覽。大關嶺在江陵府西四十五里。州之鎮山也。自女真之長白山。縱橫迤邐。據東海之濱者。不知其幾。而此嶺最高。金員外克己詩。秋霜雁未過時落。曉日雞初鳴處生。

〔藥國〕輿地勝覽。江陵府本濊國。一云鐵國。一云藥國。

〔古銅章〕三國史。新羅南解次。次雄十六年。北溟人耕田。得濊王印獻之。

漢書武帝卽位。彭吳穿濊貊朝鮮。後漢書遼東太守祭彤威讐北方。聲行海表。於是濊貊倭韓萬里朝獻。又云。句麗王宮與濊貊寇玄菟。攻華麗城。文獻備考。貊國都。在今春川府北十三里。昭陽北江。

昭陽江水接滄津。通道碑殘沒棘榛。東史未窮班掾志。堯時君命漢時臣。

〔昭陽江〕輿地勝覽。昭陽江在春川府北六里。源出麟蹄之瑞和縣。與府之基麟縣水合流。至楊口縣南。爲艸沙里灘。又至府東北。爲青淵。爲舟淵。爲狄巖灘。爲昭陽江。

〔通道碑〕東史。檀君命彭吳治國內山川。以奠民居。本紀通覽。牛首州有彭吳碑。文獻備考。彭吳乃漢人。非檀君之臣也。金梅月堂時習詩。通道自彭吳。

高句麗

魏書高句麗者。出於夫餘。自言先祖朱蒙。朱蒙母河伯女。夫餘王閉於室中。爲日所照。引身避之。日影又逐。有孕。生一卵。大如五升。以物裹之。置於曠處。有一男破殼而出。及長。字之曰朱蒙。其俗言朱蒙者。善射也。夫餘之臣謀殺之。朱蒙乃與烏引。烏達等二人。棄夫餘。東南走。遇一大水。欲濟無梁。夫餘人追之急。朱蒙告水曰。我日子河伯外孫。今日逃走。追兵垂及。如何得濟。於是魚鼈並浮成橋。朱蒙得渡。魚鼈乃解。追騎不得渡。朱蒙遂至普述水。遇見三人。其一人着麻衣。一人着衲衣。一人着水藻衣。與朱蒙至訖。升骨城居焉。號曰高句麗。因以高爲氏。三國史。高句麗始祖。東明

聖王姓高氏。自夫餘至卒本川。觀其山河險固。欲都焉。結廬於沸流水上。時年二十歲。漢元帝建昭二年也。琉璃王二十年。遷都國內。築慰那巖城山上。王十三年。移都於九都東川。王二十一年。築平壤城。移民及廟社。通典高句麗。自東晉以後。居平壤。

弧矢橫行十九年。麒麟寶馬去朝天。千秋霸氣涼于水。墓裏消沈白玉鞭。

〔麒麟寶馬〕輿地勝覽。麒麟窟。在平壤府九梯宮內。浮碧樓下。東明王養麒麟馬于此。世傳王乘麒麟馬入此窟。從地中出。朝天石升天。其馬跡。至今在石上也。朝天石。在麒麟窟南。

〔白玉鞭〕輿地勝覽。東明王墓。在中和府龍山谷。號真珠墓。世傳高句麗始祖。常乘麒麟馬。奏事天上。年至四十。遂昇天不返。太子以所遺玉鞭。葬於龍山。

昔日夫餘挾彈兒。東明王子號琉璃。聲聲黃鳥啼深樹。猶似禾姬罵雉姬。

〔挾彈兒〕三國史。琉璃王諱類利。初朱蒙在夫餘。娶禮氏女有娠。朱蒙歸後。乃生子。是爲類利。幼年出遊陌上。彈雀。誤破汲水婦人瓦器。婦人罵曰。此兒無父。故頑如此。類利慙。歸問母。我父何人。今在何處。母曰。汝父非常人。不見容於國。逃歸南地。開國稱王。類利乃與屋智句。鄒都祖等三人。行至卒本。見父王。立爲太子。

〔黃鳥〕三國史。琉璃王娶二女。一曰禾姬。鶻川人之女也。一曰雉姬。漢人之女也。二女爭寵。王於涼谷造東西二宮。各置之。後王田於箕山。禾姬罵雉姬曰。汝漢家婢妾。何無禮之甚乎。雉姬慙。恨亡歸。王聞

之策馬追之。雉姬怒不還。王嘗息樹下。見黃鳥飛集。乃感而歌曰。翩翩黃鳥。雌雄相依。念我之獨。誰其與歸。

雞立山前漲戰塵。丹旌依戀沁園春。平生忼慨愚溫達。自是龍鍾可笑人。

〔雞立山〕輿地勝覽。雞立山在聞慶縣北二十里。俗號麻骨山。以方言相似也。

〔愚溫達〕三國史。溫達容貌龍鍾可笑。家貧。乞食以養母。破衫弊履。往來市井間。時人目爲愚溫達。平岡王少女好啼。王戲曰。汝常啼聒我耳。長必不得爲士大夫妻。當歸之愚溫達。及女年二八。欲下嫁於上部高氏。公主曰。大王常語。必爲溫達之妻。何故改前言乎。王怒曰。宜從汝所適。於是公主以寶劍數十繫肘後。出宮歸溫達。後周武帝伐遼東。王逆戰於肄山之野。溫達爲先鋒疾鬪。論功第一。王嘉歎曰。吾婿也。備禮迎之。賜爵大兄。及陽岡王卽位。溫達請伐新羅。王許之。溫達臨行誓曰。雞立峴竹嶺以西。不歸於我。則不返也。遂與羅人戰。中流矢死。欲葬。柩不肯動。公主撫棺曰。死生決矣。嗚呼歸矣。遂舉以窆。

遼海歸旌數片紅。湯湯灑水捲沙蟲。乙支文德真才士。倡五言詩冠大東。

〔灑水〕輿地勝覽。清川江一名灑水。源出妙香山。經安州城北。又西流三十里。與博川江合流入海。

〔乙支文德〕三國史。乙支文德沈鷲有智。隋開皇中。煬帝下詔征高句麗。左翊衛大將軍宇文述。出夫餘道。右翊衛大將軍于仲文。出樂浪道。與九軍至鴨渌水。文德見隋軍士有饑色。欲疲之。每戰輒北。隋

軍一日七捷。東濟匯水。去平壤城三十里。因山爲營。文德遣使詐降於述。述等爲方陳而還。文德出軍四面抄擊。至蕙水。隋軍半濟。文德擊其後軍。殺右屯衛將軍辛世雄。諸軍俱潰。奔還。一日一夜至鴨綠。九軍初渡遼。三十萬五千人。還至遼東城。惟二千七百人。

〔倡五言詩〕隋書遼東之役。于仲文率軍指樂浪道。至鴨綠水。高麗將乙支文德詐降。仲文將執之。尙書右丞劉士龍固止之。遂捨文德。尋悔。遣人給文德曰。更有言議。可復來也。文德不從。遂濟。仲文選騎渡水。每戰破賊。文德遣仲文詩曰。神策究天文。妙籌窮地理。戰勝功既高。知足願云止。

句麗錯料下句麗。駐蹕山青老六師。爲問西京紅拂妓。虬髯客是莫離支。

〔下句麗〕後漢書王莽更名高句麗。王爲下句麗侯。尤侗外國竹枝詞。高句麗降下句麗。

〔駐蹕山〕唐書太宗自將伐高麗。次安市。北部傳薩高延壽。南部傳薩高惠真等。舉衆降。帝因號所幸山爲駐蹕山。勒石紀功。攻安市未能下。城中見帝旌麾。輒乘陣噪。帝怒。江夏王道宗以樹枚裹土積之。迫城不數丈。果毅都尉傅伏愛守之。自高而排其城。城且頽。伏愛私去所部。虜兵得自頽城出。據而塹斷之。積火縈盾固守。帝斬伏愛。有詔班師。會長登城拜謝。帝嘉其守。賜絹百疋。

〔莫離支〕唐書蓋蘇文者。或號蓋金。姓泉氏。自云生水中。以惑衆爲莫離支。專國。猶唐兵部尙書。中書令。職云。貌魁秀。美鬚髯。冠服皆飾以金。佩五刀。左右莫敢仰視。使貴人伏諸地。踐以乘馬。出入陳兵。長呼禁切。行人畏竄。至投坑谷。海東裨乘虬髯客傳。雖唐人傳奇。亦必有其人也。按夫餘之地。爲高氏所

統在隋唐之際。更無所謂夫餘國。南蠻所奏。海船千艘。甲兵十萬。入夫餘國云云。似指高句麗爲夫餘也。意者蓋蘇文以東部大人之子。意氣傑犖。乘隋季之亂。游歷中國。將有爲也。及見文皇異表。喪氣東返。稱兵作亂。做得莫離支爾。

報德

唐書乾封元年征高麗。以李勣爲遼東道行軍大總管兼安撫大使。三年。圍平壤。執王臧。剖其地爲都督府者九州四十二縣百。復置安東都護府。總章二年。大長鉗牟岑率衆叛。立臧外孫安舜爲王。三國史新羅文武王十年。高句麗水臨城人牟岑大兄。自窮年城行至西海史治島。見高句麗大臣淵淨。土子安勝。迎致漢城中。奉以爲君。遣小兄多式等告曰。興滅國。繼絕世。天下之公義也。惟大國是望。王處之國。西金馬渚。封安勝爲高句麗王。十四年。改封爲報德王。以王妹妻之。神文王二年。徵爲蘇判。賜姓金氏。輿地勝覽益山郡。本馬韓國。百濟並之。號金馬渚。秦卿妻金馬渚。句麗南渡有荒城。未知欲報誰家德。可惜英風劍大兄。

〔劍大兄〕三國史。高句麗劍牟岑。欲興復國家。叛唐。立王外孫安舜爲王。又云牟岑大兄。收合殘民。至浪江南。殺唐官。唐書總章二年。詔高侃李謹行爲行軍總管。討安舜。舜殺牟岑。走新羅。

沸流

遼史地理志。正州本沸流王故地。國爲公孫康所并。渤海置沸流郡。有沸流水。三國史。高句麗始

祖二年。沸流國王松讓來降。以其地爲多勿都。封松讓爲主。麗語謂復舊土爲多勿。輿地勝覽。成川府本沸流王松讓故都。

劍樣青峰一十二。遊車衣水逝湯湯。朱蒙不是真豪傑。欺負酸寒喫菜王。

〔劍樣青峰〕輿地勝覽。紇骨山在成川府西北二里。有攢峰十二。朴元亨詩。江上羣峯劍樣尖。峰前江水正揆藍。

〔遊車衣水〕輿地勝覽。沸流江卽卒本川。俗稱遊車衣津。在成川府西三十步。其源有二。一出陽德縣吳江山。一出孟山縣大毋院洞。至府北合流。歷紇骨山。山有四石穴。水入穴中。沸騰而出。故名沸流江。又與慈山郡禹家淵合流。入大同流。

〔喫菜王〕三國史。高句麗東明王。見沸流水有菜葉逐流下。知有人在上流者。因以獵往。尋至沸流國。其國王松讓出見。曰。寡人僻在海隅。未嘗得見君子。今日相遇。不亦幸乎。然不識吾子。自何而來。答曰。我是天帝子。來都於某所。松讓曰。我累世爲王。地小不足容兩主。君立都日淺。爲我附庸可乎。王忿其言。與之射以校藝。松讓不能抗。古記東明王與沸流王松讓較射。松讓以畫鹿置百步內。不能中其臍。朱蒙以玉指環懸於百步之外。破如瓦解。松讓大驚。欲以立都先後爲附庸。朱蒙造宮室以朽木爲柱。故如千歲。松讓不敢爭。

南史馬韓有五十四國。百濟卽其一也。後漸強大。兼諸小國。北史百濟之國。蓋馬韓之屬也。初以百家濟。因號百濟。其都曰居拔城。亦曰固麻城。三國史百濟始祖溫祚王。都河南慰禮城。以十臣爲輔翼。國號十濟。漢成帝鴻嘉三年也。後以百姓樂從。改號百濟。其世系與高句麗同。出扶餘。故以扶餘爲氏。溫祚王十三年。就漢山下立柵。十四年遷都蓋婁。王五年築北漢山城。近肖古。王二十六年。移都漢山。文周王元年。移都熊津。聖王十六年。移都泗泚。國號南扶餘。文獻備考百濟所夫里郡。一云泗泚。今扶餘縣。

歌樓舞殿向江開。半月城頭月影來。紅毯氍毹寒眠不得。君王愛在自溫臺。

〔半月城〕輿地勝覽。扶餘縣。半月城。石築。周一萬三千六尺。卽古百濟都城也。抱扶蘇山而築。兩頭抵白馬江。形如半月。

〔自溫臺〕輿地勝覽。自溫臺。在扶餘縣西五里。自落花巖順流而西。有巖跨水渚。可坐十餘人。俗傳百濟王遊于此巖。則巖自溫。

落日扶蘇數點峯。天寒白馬怒濤洶。奈何不用成忠策。却恃江中護國龍。

〔扶蘇〕輿地勝覽。扶蘇山。在扶餘縣北三里。東岑曰迎月臺。西岑曰送月臺。

〔成忠〕三國史。百濟義慈王十六年。佐平成忠上書曰。臣觀時察變。必有兵革之事。若二國兵來。陸路不使過沈峴。水軍不使人岐伐浦。據險以禦。然後可也。王不省。及唐兵乘勝迫城。王歎曰。悔不用成忠

之言。

〔護國龍〕輿地勝覽。扶蘇山下有巖跨江。上有龍攢跡。俗傳蘇定方伐百濟。臨江欲渡。風雨大作。以白馬爲餌。釣得一龍。須臾開霽。遂渡師。故江名白馬。巖名釣龍臺。

雨冷風淒去國愁。巖花落盡水悠悠。泉臺寂寞誰相伴。同是江南歸命侯。

〔巖花〕輿地勝覽。落花巖在扶餘縣北一里。俗傳義慈王爲唐兵所敗。宮女奔迸。登是巖。自墜于江。故名。

〔歸命侯〕唐書。顯慶五年。詔左衛大將軍蘇定方爲神邱道行軍大總管。討百濟。自城山濟海。百濟守熊津口。定方縱擊。大破。乘潮以進。拔其城。執義慈。送京師。平其國。置熊津。馬韓。東明。金漣。德安。五都督府。義慈病死。贈衛尉卿。許舊臣赴臨。詔葬孫皓。陳叔寶墓左。

浴盤零落澆臙肢。石室藏書事可疑。時見荒原秋艸裏。行人駐馬讀唐碑。

〔浴盤〕扶餘縣志。縣庭有石盤。夜銜。或燃松明炬於其上。焦黑剝缺。隱隱有蓮花刻紋。傳爲百濟宮女浴盤。

〔石室藏書〕扶餘縣志。縣之豐田驛東。有石壁巖立。圻痕如戶。號册巖。傳爲百濟時藏書處。舊有好事者。欲斲開。晴日大雷。懼而止云。

〔唐碑〕扶餘縣志。縣南二里有石塔。刻云。大唐平百濟國碑。顯慶五年歲在庚申。八月十五日。癸未。建。

陵州長史判兵曹賀遂亮撰。洛州河南權懷素書。蓋蘇定方紀功之辭也。文體駢儷。筆法遒勁。當爲海東古碑第一。縣北三里。又有劉仁願紀功碑。中折字多剝。

彌鄒忽

三國史。朱蒙自北扶餘逃難。至卒本扶餘。扶餘王以女妻之。扶餘王薨。朱蒙嗣位。生二子。長曰沸流。次曰溫祚。及朱蒙在北扶餘所生子來爲太子。沸流、溫祚恐爲太子所不容。遂與烏千馬黎等十臣南行。百姓從之者多。至漢山。登負兒岳。望可居之地。沸流欲居海濱。十臣諫曰。惟此河南之地。北帶漢水。東據高岳。南望沃澤。西阻大海。作都於斯。不亦宜乎。沸流不聽。分其民歸彌鄒忽。以居之。溫祚都河南慰禮城。沸流以彌鄒土濕水鹹。不得安居。歸見慰禮都邑鼎定。人民安泰。遂慚悔而死。輿地志。今仁川府南十里海坪上有大冢。牆垣舊址宛然。石人偃仆而甚大。俗傳彌鄒王墓云。

頂上悲歌別弟兄。登山臨水汨南征。三韓地劣姜肱被。休築崢嶸悲忿城。

〔悲忿城〕輿地志。今仁川府南有山。名南山。一名文鶴山。山上有城。世傳沸流所都。以王悲忿而死。故名悲忿城。

新羅

北史。新羅者。其先本辰韓種也。地在高麗東南。居漢時樂浪地。其王本百濟人。自海逃入新羅。遂

王其國。三國史。新羅始祖姓朴氏。諱赫。居世漢宣帝五鳳元年。四月丙辰。卽位。號居西干。時年十三。先是朝鮮遺民。分居山谷間爲六村。是爲辰韓六部。高墟村長蘇伐公望。楊山麓羅井旁林間。有馬跪而嘶。往觀之。忽不見馬。只有大卵。剖之。有嬰兒出焉。收而養之。及年十餘歲。岐嶷然。夙成大部人。以其生神異。推尊之。至是立以爲君。辰人謂瓠爲朴。以大卵如瓠。故以朴爲姓。居西干。辰言王也。文獻備考。新羅國號徐耶伐。或云斯羅。或云斯盧。東京雜記。慶州本新羅古都。

辰韓六部澹秋烟。徐苑繁華想可憐。萬萬波波加號笛。橫吹三姓一千年。

〔辰韓六部〕三國史。一曰關川楊山村。二曰突山高墟村。三曰觜山珍支村。四曰茂山大樹村。五曰金山加利村。六曰明活山高耶村。是爲辰韓六部。

〔徐苑〕文獻備考。新羅國號徐耶伐。後人稱凡京都曰徐伐。轉爲徐苑。

〔萬萬波波〕東京雜記。神文王時。東海中有小山。隨波往來。王異之。泛海入其山。上有竹一竿。命作笛。吹之。兵退。病愈。旱雨。雨晴。風定。波平。號萬波息笛。歷代傳寶之。至孝昭王。加號萬萬波波息笛。

〔三姓〕三國史。新羅始祖姓朴氏。脫解尼斯金。姓昔氏。味鄒尼斯。今姓金氏。芝峯類說。新羅享國。幾一千年。統合三韓。時和歲豐。號稱新羅聖代。

幾處青山幾佛幢。荒池雁鴨不成雙。春風谷口松花屋。時聽寥寥短尾鴉。

〔荒池雁鴨〕輿地勝覽。雁鴨池。在慶州府天柱寺北。新羅文武王鑿池。積石爲山。象巫山十二峯。種花

卉養珍禽。其西有臨海殿舊址。

〔松花屋〕東京雜記。新羅金庾信宗女。財買夫人死。葬青淵上谷。因名財買谷。每春月同宗士女會宴於谷之南澗。于時百卉敷榮。松花滿谷。架菴於谷口。名松花房。

〔短尾獺〕東京雜記。慶州北方虛缺。故狗多短尾。謂之東京狗。

料峭風中過上元。怛怛踏歌喧。年年糲飯無人祭。一陣寒鴉噪別村。

〔怛怛〕輿地勝覽。書出池。在慶州府金鰲山東。新羅炤智王十年正月十五日。王幸天泉寺。有烏鼠之異。王令騎士追烏。南至避村。兩猪相鬪。留連見之。失烏所在。有老翁自池中出。奉書題云。開見二人死。不開一人死。馳獻于王。王曰。與其二人死。莫若勿開一人死耳。日官奏云。二人者。庶人也。一人者。王也。王然之。開見書中云。射琴匣。王入宮。見琴匣射之。乃內殿焚。修僧與宮主潛通謀逆也。宮主與僧伏誅。名其池曰書出池。又云。王既免琴匣之禍。國人以爲若非烏鼠龍馬猪之功。則王之身憾矣。遂以正月上子。上辰。上午。上亥。等日。忌百事。不敢動作。爲慎日。俚言怛怛。謂悲愁而禁忌也。又以十六日爲烏忌日。以糲飯祭之。國俗至今猶然。估畢齋集怛怛歌。怛怛復怛怛。大家幾不保。流蘇帳裏玄鶴倒。揚且之哲難借老。

金鰲山色晚蒼蒼。渲染雞林一半霜。萬疊伽椰人去後。至今紅葉上書莊。

〔金鰲山〕輿地勝覽。金鰲山。一名南山。在慶州府南六里。唐顧雲贈崔致遠詩。我聞海上三金鰲。金鰲

頭戴山高高。山之上兮。珠宮貝闕黃金殿。山之下兮。千里萬里之洪濤。

〔雞林〕三國史。脫解尼斯。今九年春三月。王聞金城西始林樹間。有雞鳴聲。遣瓠公視之。金色小檜掛樹枝。白雞鳴其下。瓠公還以告王。使人取檜開之。有小男兒在其中。姿容奇偉。王喜曰。此豈非天遣我令膺乎。收養之。及長。聰明多智。乃名閼智。以其出於金檜。姓金氏。改始林名雞林。因以爲國號。

〔伽椰〕輿地勝覽。伽椰山在陝川郡北三十里。一名牛頭山。

〔上書莊〕三國史。崔致遠字孤雲。或云海雲。沙梁部人。年十二。隨使舶入唐。乾符元年。禮部侍郎裴瓚下及第。調溧水縣尉。考績爲承務郎。侍御史。內供奉。賜紫金魚袋。黃巢叛。高駘爲諸道行營兵馬都統。以討之。辟致遠爲從事。光啓元年。將詔書來聘。留爲侍讀。兼翰林學士。出爲太山太守。自西事大。唐東歸故國。皆遭亂世。無復仕進意。帶家隱伽椰山解印寺。偃仰終老。輿地勝覽。上書莊在金鰲山北。高麗太祖之興。崔致遠知必受命。上書有雞林黃葉。鵠嶺青松之語。後人名其所居曰上書莊。

城南城北蔚藍峯。落日昌林寺裏鐘。閒補東京書畫傳。金生碑版率居松。

〔金生〕三國史。金生自幼能書。平生不攻他藝。年踰八十。猶操筆不休。隸書、竹艸皆入神。崇寧中。學士洪灌隨進奉使入宋。館於汴京。翰林待詔楊球。李革奉勅至館書圖篋。灌以金生行艸一卷視之。二人大駭曰。不圖今日得見右軍手書。灌曰。此乃新羅人金生書也。二人不信之。趙子昂昌林寺碑跋云。右唐新羅僧金生所書。其國昌林寺碑。字畫深有典刑。雖唐人名刻。無以遠過之也。古人云。何地不生才。

信然。輿地勝覽。昌林寺在金鰲山。今廢。有古碑無字。

〔率居〕三國史。率居善畫。嘗於皇龍寺壁畫老松。體幹鱗皴。烏鳶往往望之飛入。及到。踰躍而落。歲久色暗。寺僧以丹青補之。烏鳶不復至。又慶州芬皇寺觀音。晉州斷俗寺維摩像。皆其筆也。

三月初旬去踏青。蚊川花柳鎖冥冥。流觴曲水傷心事。休上春風鮑石亭。

〔蚊川〕輿地勝覽。蚊川在慶州府南五里。史等川下流也。高麗金克已有蚊川被禊詩。

〔鮑石亭〕輿地勝覽。鮑石亭在慶州府南七里。金鰲山西麓。鍊石作鮑魚形。故名。流觴曲水。遺跡宛然。三國史。甄萱猝入新羅王都時。王與夫人嬪御出遊鮑石亭。置酒娛樂。賊至狼狽不知所爲。侍從臣僚及宮女伶官皆陷沒。萱縱兵大掠。使人捉王至前戕之。入居宮中。強引夫人亂之。

溟州

三國史。新羅宣德王薨無子。羣臣議欲立族子周元。周元宅京北二十里。會大雨。闕川漲。不得渡。或曰。天其或者不欲立周元乎。今大上等敬信前王之弟。德望素高。有人君之體。於是衆議翕然立之。旣而雨止。國人皆呼萬歲。輿地志。周元懼禍。退居溟州。不朝請。後二年。封周元爲溟州郡王。割溟州翼嶺三陟斤乙於蔚珍等地。爲食邑。文獻備考。溟州。今江陵府。

雞林眞骨大王親。九雉分供左海濱。最憶如花池上女。魚書遠寄倦遊人。

〔眞骨〕三國史。新羅斯多含。系出眞骨。又薛鬪頭言新羅用人。論骨品。令狐澄新羅國記。其國王謂之

第一骨餘貴族調第二骨。

〔九雉〕文獻備考。新羅之制。王日飯米三斗。雄雉九首。

〔魚書遠寄〕高麗史樂志。高句麗俗樂部有溟州曲。世傳書生遊學至溟州。見一良家女。美姿色。頗知書。生每以詩挑之。女曰。婦人不妄從人。待生擢第。父母有命。則事可諧矣。生卽歸京師。習舉業。女家將納婿。女平日臨池養魚。魚聞警咳聲。必來就食。女食魚謂曰。吾養汝久。宐知我意。將帛書投之。有一大魚跳躍含書。悠然而逝。生在京師。一日爲父母具饌。市魚而歸。剝之得帛書。驚異。卽持帛書及父書徑詣女家。婿已及門矣。生以書示女家。遂歌此曲。女父母異之曰。此精誠所感。非人力所能爲也。遣其婿而納生焉。疆界志。新羅王弟。無月郎二子。長曰周元。次曰敬信。母溟州人。始居蓮花峯下。號蓮花夫人。及周元封於溟州。夫人養於周元。溟州曲卽蓮花夫人事。書生指無月郎也。且溟州乃新羅時置。非高句麗時名。則溟州曲當屬新羅樂。

金官

南齊書。加羅國。三韓種也。建元元年。國王荷知使來獻。授輔國將軍。本國王。北史。新羅附庸於迦羅國。三國史註。伽倻。或云加羅。駕洛國記。後漢光武建武十八年三月。駕洛九千襖。飲水濱。望見龜旨峰。有異氣。就見紫繩繫金盒而下。開盒有金色六卵。奉置之。翼日。六卵剖爲六童子。曰。就岐嶷十餘日。身長九尺。衆奉一人爲主。卽首露王也。生于金盒。因姓金氏。國號伽倻。乃新羅儒理王。

十八年也。餘五人爲五伽椰主。東以黃山江西南以海西北以智異山東以伽椰山爲境。輿地勝覽五伽椰高靈爲大伽椰固城爲小伽椰星州爲碧珍伽椰咸安爲阿邨伽椰咸昌爲古寧伽椰又云龜旨峯在金海府北三里首露王宮遺址在府內輿地志首露王墓在金海府西三百步墓旁有廟龜旨山東有王妃墓府人並祭以正五八月芝峯類說壬辰倭賊發首露王墓頭骨大如銅盆柩旁有二女顏色如生出置城外卽銷文獻備考駕洛或作伽落又稱伽椰後改爲金官訪古伽椰咽竹枝婆娑塔影虎溪湄回看落日沈西海正似紅旗入浦時。

〔訪古伽椰〕鄭圃隱夢周金海燕子樓詩訪古伽椰艸色春興亡幾度海爲塵。

〔婆娑塔〕輿地勝覽婆娑石塔在虎溪上凡五層其色赤斑雕鏤甚奇世傳許后自西域來時船中載此塔以鎮風濤。

〔虎溪〕輿地勝覽虎溪在金海府城中源出盆山南流入江倉浦。

〔紅旗入浦〕駕洛國記東漢建武二十四年許皇后自阿踰陀國渡海而至望見緋帆茜旗自海西南隅而指北首露王於宮西設幔殿候之王后維舟登陸憇於高嶠解所著綾袴質于山靈及至王迎入幔殿越二日同輦還闕立以爲后國人號初來維舟處曰主浦解綾袴處曰綾峴茜旗入海處曰旗出邊輿地勝覽許皇后或云南天竺國王女姓許名黃玉號普州太后。

大伽椰

三國史。眞興王二十三年。命異斯夫討伽倻。多斯舍爲副。領五千騎。馳入梅檀門。立白旗。城中恐懼。不知所爲。異斯夫引兵臨之。一時盡降。輿地志。大伽倻。今高靈縣。縣南一里。有宮闕遺址。又有石井。號御井。文獻備考。大伽倻。始祖伊珍阿鼓王。至道設智王。凡十六世。崔孤雲釋利貞傳。伽倻山神。正見母主。乃爲天神夷毗訶之所感。生大伽倻王惱室朱日。金官國王惱室青裔。二人。輿地勝覽。惱室朱日。爲伊珍阿鼓王之別稱。青裔。爲首露王之別稱。

千載高山流水音。泠泠一十二絃琴。淒涼往事無人問。紅葉迎霜作錦林。

〔一十二絃琴〕輿地勝覽。伽倻國。嘉悉王樂師。于勒。象中國秦箏而制琴。號伽倻琴。高靈縣北三里。地名琴谷。世傳勒率工人肄琴處。芝峰類說。伽倻國王。制十二絃琴。今所謂伽倻琴卽是。

〔錦林〕輿地勝覽。高靈縣西二里。有古藏。俗稱錦林王陵。

甘文

三國史。新羅助賁尼斯。今二年。以伊滄于老爲大將軍。討破甘文國。以其地爲郡。輿地志。甘文。今開靈縣也。甘文山。在縣北二里。又柳山在縣東二里。柳山北甘文國遺址尙存。

璋姬。一去野花香。埋沒殘碑古。孝王。三十雄兵曾大發。蝸牛角上鬪千場。

〔璋姬〕輿地勝覽。璋陵在開寧縣西熊峴。俗稱甘文國璋夫人陵。

〔孝王〕輿地勝覽。開寧縣北二十里。有大冢。俗傳甘文金孝王陵。

〔三十兵〕東史。甘文國大發兵三十。文獻備考。甘文。蓋國之至小者也。

于山

三國史。新羅智證麻立千十三年。于山國歸服。歲以土空爲貢。于山國在溟洲正東海島。或名鬱陵島。輿地勝覽。鬱陵島一云武陵。又云羽陵。在蔚珍縣正東海中。地方百里。土地饒沃。竹大如杠。鼠大如貓。桃核大如升。

春風五兩。邈帆迴海上。桃花寂寞開。唯見可之登岸臥。更無獅子撲人來。

〔邈帆〕文獻備考。鬱陵島產柴胡、藁本、石楠、藤艸、諸香木。蘆竹多合抱者。蘆實桃核。大可爲杯升。本朝刷出逃民。空其地。每三年一送人審視。官給斧子十五。伐其竹若木。又采土物納于朝以爲信。三陟營將越松萬戶相遞入焉。

〔可之〕文獻備考。鬱陵島海中有獸。牛形。赤眸無角。羣臥海岸。見人獨行害之。遇人多走入水。名可之。〔獅子〕三國史。吳斯夫爲阿瑟部軍主謀。并于山國。謂其國人愚悍。可以計服。乃多造木獅子。載之戰船。抵其國境。告曰。汝若不服。放此獸踏殺之。其人恐懼而降。

耽羅

北史。百濟南海行有耽牟羅國土。多獐鹿。附庸於百濟。唐書龍朔初。有儋羅者。其王儒理都羅。遣使入朝。國居新羅武州南島上。俗朴陋。衣大豕皮。夏革屋。冬窟室。初附百濟。後附新羅。耽羅國記。

厥初有三神人從地湧出。曰良乙部。曰高乙部。曰夫乙部。三乙部遊獵荒僻。皮衣肉食。一日見紅帶紫衣人。函載青衣處女三。及駒犢五穀種。浮海而至。曰。我是日本國使也。吾王生此三女。云西海中降神子三人。將開國而無匹。故送此三女。三乙部以歲次分娶之。播五穀。牧駒犢。日就繁庶。良乙部所居曰第一都。高乙部所居曰第二都。夫乙部所居曰第三都。高乙部十二代孫。高厚。高厚等至。王嘉之。稱厚曰星主。以其動星象也。令清出袴下。愛如己子。稱曰王子。又號其季曰都內。國號耽羅。以來泊耽津。朝新羅也。各賜寶蓋衣帶而遣之。自此事新羅。遂以高爲星主。良爲王子。夫爲都上。後改良爲梁。輿地勝覽。濟州本耽羅國。或稱毛羅。又耽牟羅。

三乙部城瘴霧開。耽津江口峭帆迴。厥初還有毛興穴。何必他人袴下來。

〔耽津〕文獻備考。今康津縣。新羅耽津。

〔毛興穴〕輿地勝覽。濟州牧鎮山北麓有穴。曰毛興穴。卽三乙部湧出處也。

後百濟

三國史。甄萱。尙州加恩縣人也。體貌雄奇。志氣倜儻。從軍赴西南海防。以勞爲裨將。新羅眞聖王六年。羣盜蜂起。萱嘯聚徒侶。擊京西南州縣。所至響應。遂襲武珍州。都完山。自稱後百濟王。遣使入後唐稱藩。唐策授檢校太尉。兼侍中。判百濟軍事。持節都督全武公等州軍事。行全州刺史。海

東四面都統指揮兵馬制置等事。百濟王食邑二千五百戶。輿地勝覽古土城在全州府北五里。甄萱所築。

往事悠悠疽背翁。續紛紅葉古城東。可憐探覈金山寺。亡國何關絕影驄。

〔疽背翁〕三國史甄萱有子十餘人。第四子金剛身長而多智。萱愛之。欲傳位。其兄神劍幽萱於金山佛宇。殺金剛。自稱大王。萱與季男能父。女衰福。嬖妾姑比等。逃竄高麗。高麗太祖待以厚禮。尊爲尙父。萱發疽。卒於黃山佛舍。

〔續紛紅葉〕鄭圃隱夢周全州萬景樓詩。青山隱約扶餘國。紅葉續紛百濟城。

〔絕影驄〕高麗史甄萱獻絕影鳥驄馬于太祖。後聞讖云。絕影名馬至。百濟亡。乃悔之。使人請還。太祖笑而許之。

秦封

通鑑唐天祐初。高麗石窟寺。眇僧躬父。聚衆據開州。稱王。號太封國。後梁貞明中。遣佐良尉金立奇入貢于吳。三國史弓裔新羅人。考憲安王。或云景文王之子。祝髮爲僧。號善宗。軒輊有膽氣。羅季羣盜蜂起。善宗投北原賊梁吉軍中。吉委任分兵。使東略地。遂擊破猪足。牲川。夫若。金城。鐵原等城。天復元年。稱王。國號摩震。年號武泰。移青州人戶一千入鐵圓城爲京。改武泰爲聖冊元年。分定溇西十三鎮。朱梁乾化元年。改聖冊爲水德萬歲。改國號爲秦封。自稱彌勒佛。頭戴金幘。身

被方袍。以長子爲青光菩薩。季子爲神光菩薩。出則騎白馬。以綵飾其鬃尾。使童男女奉幡蓋。香火前導。又命比丘二百餘人。梵唄隨後。輿地勝覽。楓川原弓裔所都。在鐵原府北二十里。宮殿遺址寂然。

烏鵲飛邊認故宮。淒涼霸業黑金東。設弧猶記端陽節。未作鷄林老辭公。

〔烏鵲〕鄭松江澈。關東別曲。弓王故闕墟。烏鵲啾啾。千古興亡。知不知不。

〔黑金東〕高麗史。唐商客王昌瑾。忽於市中見一人。狀貌瓌偉。鬚髮皓白。左手持三椀。右手擊一古鏡。方一尺許。謂昌瑾曰。能買我鏡乎。昌瑾以二斗米買之。鏡主將米沿路散與乞兒而去。疾如旋風。昌瑾懸其鏡於市壁。日光斜映。隱隱有細字可讀。其文曰。三水中。四維下。上帝降子於辰馬。先操鷄。後搏鴨。此謂運滿一三甲。暗登天。明理地。遇子年中興大事。混蹤跡。沌名姓。混沌誰知慎與聖。振法雷。揮神電。於已年中二龍見。一則藏身青木中。一則現影黑金東。智者見。愚者盲。興雲注雨與人征。或見盛。或視衰。盛衰爲滅惡塵滓。此一龍子三四遞代相承六甲子。此四維。定滅丑。越海來降須待酉。此文著見於明王國泰人安帝永昌吾之記。凡一百四十七字。昌瑾初不知有文。及見之。謂非常。獻于裔。裔令昌瑾物色求其人。彌月不能得。唯東州勃颯寺熾盛光如來像前。有填星古像如其狀。左右亦持椀鏡。昌瑾喜。具以狀白裔。嘆異之。令文人宋含弘。白卓。許原等解之。含弘等曰。辰馬者。辰韓。馬韓也。青木。松也。謂松岳郡也。黑金。鐵也。今所都鐵圓也。今主初盛於此。終滅於此乎。先操鷄。後搏鴨者。王侍中御國之後。

先得鷄林。後收鴨綠之意也。三人相謂曰。王猜忌嗜殺。若告以實。王侍中必遇害。吾輩亦且不免矣。乃詭辭告之。

〔設弧端陽〕三國史。弓裔以五月五日生而有齒。憲安王惡之。勅令殺之。使者取襁褓中投樓下。乳婢竊捧。手觸眇一目。

高麗

五代史。長興三年。高麗權知國事王建。遣使者來。明宗乃拜建玄菟州都督。充大義軍使。封高麗國王。高麗史。太祖神聖大王。姓王氏。諱建。字若天。松岳郡人。新羅政衰。弓裔據高句麗之地。都鐵原。國號太封。授太祖精騎大監。著功累階。爲波珍粲兼侍中。梁貞明四年。騎將洪儒裴玄慶申崇謙。卜智謙等。密謀推戴。國號高麗。改元天授二年。定都于松岳之陽。文獻備考。開城府。高麗國都。荒涼。二十八王陵。風雨年年。暗漆燈。進鳳山中紅躑躅。春來猶自發層層。

〔二十八王陵〕文獻備考。高麗太祖以下二十八陵。在開城府松岳進鳳山。碧串洞。鳳鳴山諸處。

〔進鳳躑躅〕輿地勝覽。進鳳山。在開城府東南九里。杜鵑花盛開。世稱進鳳躑躅。

鳳輦逶遲降帝姬。春寒襁帳被羊脂。浮生白眼應難較。紅淚先添勺藥枝。

〔帝姬〕高麗史。忠烈王后。齊國大長公主。名忽都魯揭里迷失。元世祖女也。元宗十五年。忠烈王世子在元尙公主。

〔被羊脂〕高麗史。忠烈王嗣位。與公主東還。同輦入京。父老相慶。帝令脫忽送公主。脫忽先至。張穹廬。祓以白羊膏。

〔白眼〕高麗史。公主生子貞和。宮主宴賀行酒。王顧見公主。公主曰。何白眼視我耶。豈以宮主跪於我乎。遂命罷宴。下殿大哭。

〔勺藥枝〕高麗史。忠烈王二十二年五月。壽寧宮勺藥盛開。公主命折一枝。把玩良久。感泣得疾。薨。年三十九。

結識中朝趙子昂。風流都尉瀋陽王。教人提舉征東省。留醉蘆溝萬卷堂。

〔瀋陽王〕元史。高麗王昺子諫襲王位。成宗初年。尙寶塔實憐公主。十一年。進爵瀋陽王。

〔征東省〕元史。至元二十年。立征東行中書省於高麗。

〔萬卷堂〕高麗史。忠宣王諱璋。古諱諫。蒙古諱益智禮普化。如元宿衛。凡十年。佐仁宗定內亂。迎立武宗。以太尉留燕邸。搆萬卷堂書史自娛。姚燧。閻復。元明善。趙孟頫。咸遊王門。

銀燭如星照禁扃。題詩多上牧丹亭。如今破瓦嵩山在。不復三呼繞殿青。

〔牧丹亭〕李相國集。山呼亭。牧丹盛開。賦者多至百人。輿地勝覽。山呼亭。在延慶宮內。

〔嵩山〕輿地勝覽。松岳在開城府北五里。初名扶蘇。又稱鵠嶺。又崧山。又神嵩。

〔三呼繞殿〕高麗史。忠宣王時。松岳夜鳴。王恠而問之。陳無作對曰。無傷也。古詩有嵩岳三呼繞殿青。

之句。王悅。

指點前朝宰相家。廢園風雨土牆斜。牧丹孔雀凋零盡。黃蝶雙飛菜花。

〔牧丹孔雀〕高麗史。神宗初參知政事。車若松與特進奇洪壽同入中書省。若松問於洪壽曰。孔雀好在乎。答曰。食魚鯁咽而死。因問養牧丹之術。若松具道之。問者譏之。

潮落潮生急水門。年年商舶到江村。攢峯十二巫山似。只少三聲墮淚猿。

〔急水門〕宋史。禮成江。居兩山間。束似石碕。湍激而下。所謂急水門。最險狹。大明一統志。急水門在開城南海中。宛如巫碕。

〔商舶〕高麗史。宋商集禮成江。

天壽南門春暮時。丹樓碧閣影參差。風簷雨笠何村客。終日沈吟看鷺鷥。

〔天壽〕輿地勝覽。天壽院在城東。卽天壽寺故址。

〔看鷺鷥〕高麗史。康日用欲賦鷺鷥。每冒雨。至天壽寺南溪看之。

紫霞洞裏艸霏霏。不見宮姬並馬歸。爲是辛王行樂地。至今猶有燕雙飛。

〔紫霞洞〕輿地勝覽。紫霞洞在松岳山下。洞府幽阻。溪水清澗。最爲絕勝。

〔辛王〕明史。高麗王顯無子。以寵臣辛盹之子禍爲子。高麗史。辛禍小子牟尼奴。盹婢妾般若之出也。

〔燕雙飛〕高麗史。辛禍使妓燕雙飛。佩弓吹篳。衣繡龍衣。並轡而行。

可憐青木未藏龍。蕭瑟千年鶴嶺松。鐵犬寥寥東向吠。白雲飛盡見三峯。

〔鐵犬〕松京雜記。世傳神僧道詵爲麗祖。定都松岳之陽。旣而雲捲東南。見漢陽三角山。嶺兀天際。跌足歎咄。鑄鐵犬十二使吠之。蓋以三角爲松岳之窺峯云。今府東有坐犬里。



178